

明史稿

列傳第一百五十七

光祿大夫

經筵講官明史總裁戶部尚書加七級臣王鴻緒奉

敕編撰

循吏

陳灌

方克勤

吳履

高斗南

史誠祖

謝子襄

貝秉彝

周濟

萬觀

葉宗行

王源

翟溥福

李信圭

張宗璉

李驥

李湘

趙豫

范希正

曾泉

范衷

陳鋼

丁積

田鐸

唐侃

湯紹恩

徐九思

龐嵩

張淳

元季吏治縱弛民生凋敝明太祖初以振肅紀綱爲務刻繩貪吏置之重典府州縣吏來朝陛辭諭曰天下新定百姓財力俱困如鳥初飛木初植勿拔其羽勿撼其根然唯廉者能約已而愛人貪者必賸人以肥已爾等戒之五年下詔有司考課首崇學校農桑諸實政日照知縣馬亮善督運無課農興士效立命黜之一時郡縣吏咸畏法潔已愛民以當上指較元吏治煥然丕變下迨仁宣政務撫綏民生安樂吏治澄清者凡百餘年英武之際內外多故而宗社莫安亦由吏鮮

貪殘故禍亂易靖也神宗末年礦稅四出蕭然煩費吏失其  
職民生困矣然人重名節而甲科授縣令者政績有聞輒擢  
臺諫一中考功法便終身廢棄故賊墨自污之輩往往而鮮  
但二百七十年間守令課績大率以錢穀簿書爲急三代雅  
化渺乎莫睹矣漢史丞相黃霸唐史節度使韋丹皆入循吏  
傳中今自守令起家至公卿有勲德者事皆別見故採其終  
於庶僚政績可紀者作循吏傳

陳灌字子將廬陵人也元末世將亂環所居築塲種樹人莫  
能測後十年盜蠡起灌率武勇結屯林中盜不敢入一鄉賴  
以全太祖平武昌灌詣軍門謁見與語奇之擢湖廣行省員  
外郎累遷大都督府經歷從大將軍徐達北征尋命築城泰

州工竣除寧國知府時天下初定民棄詩書久灌建學舍延師選俊秀子弟受業教化洽於遠近訪問疾苦禁豪右兼并創戶帖以便稽民帝取爲式頒行天下以暇伐石築堤作水門蓄洩護瀕江田百姓咸賴有坐盜麥舟者論死數十人灌覆按曰舟自漂至而愚民鬪取之非謀劫也坐其首一人餘悉減死灌丰裁嚴正而爲治寬恤類此洪武四年召入京病卒

方克勤字士矜寧海人元末台州盜起吳江同知金剛奴奉行省命募水兵禦之克勤獻策弗納逃山中乏食日採松柏以贍饑洪武二年辟縣訓導尋以母老辭歸四年徵至京師命吏部試名列第二特授濟寧知府時始詔民墾荒闢三歲

乃稅吏徵率不俟期民謂詔旨不信輒棄去田復荒克勤與民約稅如期區田爲九等以差等徵發吏不得爲奸野以日闕又立社學數百區葺孔子廟堂教化興起盛夏守將督民夫築城克勤曰民方耕耘不暇柰何重困之畚鍤密請之中書省得罷役先是久旱遂大澍濟寧人歌之曰孰罷我役使君之力孰活我黍使君之雨使君勿去我民父母視事三年鞭扑不用戶口增數倍一郡饒足克勤爲治以德化爲本不喜近名嘗曰近名必立威立威必殃民吾不忍也自奉簡素一布袍十年不易日不再肉食太祖用法嚴士大夫多被謫過濟寧者克勤輒周恤之永嘉侯朱亮祖嘗率舟師赴北平水涸役夫五千濬河克勤不能止泣禱於天忽大雨水深數

尺舟遂達民以爲神八年入朝太祖嘉其績賜宴遣還郡尋爲屬吏程貢所誣謫役江浦復以空印事連逮死子孝聞孝孺孝聞十三喪母蔬食終制孝孺自有傳

吳履字德基蘭谿人少受業於聞人夢吉通春秋諸史李文忠鎮浙東聘爲郡學正久之舉於朝授南康丞南康俗悍謂丞儒也易之居數月摘發奸伏如老獄吏則皆大驚相率斂跡履乃改崇寬大與民休息知縣周以中巡視田野爲部民所詈捕之不獲怒盡繫其鄉鄰履閱獄問故立釋之乃白以中以中益怒曰丞慢我履曰犯公者一人耳其鄰何罪今繫者衆而捕未已急且有變奈何以中意乃解邑有淫祠每祀輒有蛇出戶民指爲神履縛巫責之沈神像於江淫祠遂絕

爲丞六年百姓愛之遷安化知縣大姓易氏保險自守江陰  
侯吳良將擊之召履計事履曰易氏逃死耳非反也招之當  
來不來誅未晚良從之易氏果至良欲籍農故爲兵者民大  
恐履曰世清矣民安於農請籍其願爲兵者不願可勿強良  
又從之晉濰州知州山東民常以牛羊代秋稅履與民計曰  
牛羊有死瘠患不若輸粟便他日上官令民送牛羊之陝西  
他縣民多破家濰民獨完會改州爲縣召履還濰民皆涕泣  
奔送履遂乞骸骨歸是時河內丞廖欽竝以廉能稱居八年  
調吳江後坐事謫戍久之以老病放歸道河內河內民競持  
羊酒爲壽且遺之縑須臾輿數百匹欽固辭不得一夕遽去  
他若興化丞周舟以績最特擢吏部主事民爭乞留乃遣還

之歸安丞高彬曹縣主簿劉郁衡山主簿紀惟正霑化典史杜濩皆坐事以部民乞宥復其官而惟正立擢陝西參議其後州縣佐貳之知名者在仁宣時則易州判官張友聞壽州判官許敏許州判官王通靈璧丞田誠安平丞耿福緣嘉定丞戴肅大名丞賀禎昌邑主簿劉整襄垣主簿喬育貴池典史黃金蘭溪澤典史高文英景時則茂州判官汪浩泰州判官王思旻上海丞張禎吳江丞王懋本歷城丞熊觀黔陽主簿古初雲南南安州琅井巡檢李保或超遷或遷任皆因部民請云

高斗南字拱極陝西徽州人貌魁梧語音若鐘洪武中由薦舉授四川定遠知縣才識精敏多善政二十九年與知府永

州余彥誠知縣齊東鄭敏儀真康彥民岳池王佐安肅范志遠當塗孟廉及丞懷寧蘇益休寧甘鏞當塗趙森竝坐事先後被徵其耆民奔走闕下具列善政以聞太祖嘉之賜襲衣寶鈔遣還并賜耆民道里費諸人旣還任政績益著尋舉天下廉吏數人斗南與焉列其名於彰善榜聖政記以示勸九載績最擢雲南新興知州新興人愛之不異定遠居數年以衰老乞歸薦子吏科給事中恂自代成祖許之年七十而卒恂字士信博學能詩文官新興從大軍征交趾有協贊功師旋卒於官彥誠德興人初知安陸州以征稅愆期當就逮其父老伏闕乞留太祖賜宴嘉賞遣還父老亦預宴久之擢知永州府至是復獲原終河東鹽運使敏嘗坐事被逮部民數

千人守闕下求宥帝宴勞復其官賜錢百錠衣三襲居數年  
考滿入朝部民復走京師乞再任帝從其請及是再獲宥彥  
民泰和人洪武二十七年進士先知青田調儀真後歷巴陵  
天台並著名績永樂初罷歸洪熙元年御史巡按至天台縣  
民二百餘人言彥民廉公有爲乞還之天台慰民望御史以  
聞宣宗歎曰彥民去天台二十餘年民猶思之其有善政可  
知乃用爲江寧縣丞益廉森三人旣釋還明年復以事當逮  
縣民又走闕下頌其廉勤帝亦釋之時太祖操重典繩羣下  
守令坐小過輒逮繫聞其賢旋遣還且加賞賚有因以超擢  
者二十九年知縣靈璧周榮宜春沈昌昌樂于子仁丞新化  
葉宗竝坐事逮訊部民爲叩闕太祖喜立擢四人爲知府榮

河南昌南安子仁登州宗黃州由是長吏競勸一時多循良之績焉榮字國華蓬萊人初爲靈璧丞坐累逮下刑部耆老羣赴輦下稱其賢帝賜鈔八十錠綺羅衣各一襲命禮部宴榮及耆老而還之無何擢榮靈璧知縣及知河南亦有聲後建言稱旨擢河南左布政使

史誠祖解州人洪武末詣闕陳鹽法利弊太祖納之授汶上知縣爲治廉平寬簡永樂七年成祖北巡遣御史考覈郡縣長吏賢否還言誠祖治第一賜璽書勞之曰守令承流宣化所以安利元元朕統御天下夙夜求賢共圖治理往往下詢民間皆言苦吏苛急能副朕心者實鮮爾敦厚老成恪其乃職持身勵志一於廉公平賦均徭政清訟簡民心悅戴境內

稱安方古良吏亦復何讓特擢爾濟寧知州仍視汶上縣事其益其乃職慎終如始以永嘉譽欽哉并賜內醢一尊織金紗衣一襲鈔千貫御史又言貪吏虐民無若易州同知張騰遂徵下獄誠祖旣得旌益勤於治土田增闢戶口繁滋益編戶十四里成祖過汶上欲徙其民數百家於膠州誠祖奏免之屢當遷職輒爲民奏留閱二十九年竟卒於任士民哀號留葬城南歲時奉祀是時縣令多久在蠡縣吳祥永樂時知嵩縣至宣德中閱三十二年卒於任臨汾李信永樂時由國子生授遵化知縣至宣德中閱二十七年始擢無爲知州以年老不欲赴遂乞歸涓縣房畝宣德間爲鄒縣知縣至正統中閱二十餘年卒於任吏民皆愛戴之而吉水知縣武進錢

米中有廉名註誤罷官父老奔走號泣乞留郡人胡廣力  
之得還任民間本中復來空閒并迎拜永樂中卒官民立  
留葬吉水爭負土營墳其得民如誠祖云

謝子襄名衮以字行新淦人建文中由薦舉授青田知縣永  
樂七年與錢塘知縣黃信中開化知縣夏升竝九載課最富  
遷其部民相率訴於上官乞再任上官以聞帝嘉之卽擢子  
襄處州知府信中杭州升衢州俾得治其故縣子襄治處州  
聲績益著郡有虎患歲旱蝗禱於神大雨二日蝗盡死虎亦  
遁去有盜竊官鈔子襄檄城隍神盜方閱鈔密室忽疾風捲  
墮市中盜卽伏罪民鬻牛於市將屠之牛逸至於子襄前俛  
首若有訴乃捐俸贖還其主叛卒吳米據山谷爲亂朝廷發

兵討之一郡洶洶予襄力止軍城中毋出而自以計掩捕之獲其魁餘悉解散爲人廉謹歷官三十年不以家累自隨二十二年卒信中餅千人先知樂清縣奸人紹寡婦至京誣告鄉人謀叛而已逸去有司繫其婦以聞詔行所司會鞠信中廉得其情力詆爲誣獲全者甚衆盜殺一家三人獄久不決信中禱於神得真盜遠近稱之升鹽城人

貝秉彝名恒以字行上虞人永樂二年進士授邵陽知縣以憂去補東阿善決獄能以禮義導民歲大侵上平糴備荒議帝從之班下郡縣如東阿式邑西南有巨浸積潦爲田害秉彝相視高下鑿渠引入大清河涸之得沃壤數百頃民食其利尤善綜畫凡廢鐵敗皮朽索故紙悉藏之暇令工匠煮膠

鑄杵擣紙絞索貯於庫會成祖北巡勅有司建席殿秉彝出  
所貯濟用工遂速竣帝將召之東阿耆老百餘人詣闕自言  
願留貝令帝許之九載考滿入都詔進一階仍還東阿嘗坐  
累罰役京師民競代其役三罰三代乃復官秉彝爲吏明察  
而仁恕素善飲已仕遂已之宣德元年卒官時龍溪知縣南  
昌劉孟雍鄒縣知縣龍溪朱瑤建安知縣崑山張準婺源知  
縣建安吳春歙縣知縣江西樂平石啓宗皆有惠利民率懷  
思不忘云

周濟字大亨洛陽人永樂中以舉人入太學歷事都察院都  
御史劉觀薦爲御史固辭宣德時授江西都司斷事艱歸補  
湖廣正統初擢御史大同鎮守中官以驕橫聞勅濟往廉之

濟變服負薪入其宅盡得不法狀還報帝大嘉之已巡撫四川威州土官董敏王允相讐殺詔濟督官兵進討濟曰朝廷綏安遠人宜先撫而後征馳檄諭之遂解十一年出爲安慶知府歲比不登民間鬻子女充衣食方舟而去者相接濟借漕糧以賑而禁鬻子女者日上疏請免租詔許之全活甚衆又爲定婚喪制禁侈費懲嫁葬期者有罰風俗一變饑民聚掠富家粟富家以盜劫告濟下令曰民饑故爲此然得穀當報太守數太守當代爾償掠者遂解散濟由御史除外吏恬然自適鑿池於官署園中置小艇暇則幅巾鶴氅吟嘯艇中卒於官民皆罷市巷哭云

萬觀字經訓南昌人弱冠成永樂十九年進士帝少之令歸

肄學尋名爲御史改嚴州知府府東境七里瀧漢嚴子陵釣臺址也有漁舟數百艇時剽行旅觀編丁舟爲一甲令畫地巡警不匝月盜屏跡乃勵學校勸農桑癸減織造以銀代絲稅民皆便之九年考績治行爲海內第一旣以憂去將除服嚴州民豫上章願復得觀爲守金衢民亦上章乞之朝廷異焉補平陽府政績益茂有芝生堯祠棟上士民皆言使君德化所致觀曰太守知奉職而已芝非吾爭也考滿擢山東布政使卒於官

葉宗行松江華亭人尚氣節永樂中尚書夏原吉治水東南宗行以諸生上疏請濬范家港引浦水入海禁瀕海民毋作壩以遏其流帝令赴原吉所自效工竣原吉薦之授錢塘知